



13. februar 2024

UPA 2024/119

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Qanoq iliornikkut tusagassiortunngorusunneq annertusarsinnaanersoq pillugu apeqquteqaat aallaavigalugu Inatsisartunut oqallisissiasatut siunnersuut.

(Inatsisartunut ilaasortaq Aqqalu C. Jerimiassen, Atassut)

Pissaanerup pingasoqiusamik agguataarnerata avataatigut tusagassiorfiit sisamaattut inissisimasussaapput. Kiffaanngissuseqarlutik inuiaqatigiinni eqqunngitsut pissusissamisunngitsut allaallu apeqqusigassat siammartertartussaavaat. Tassaappullu innuttaasut sinnerlugit uparuaasinnaassusillit.

Ullutsinnili nunatsinni tusagassiorfiit tusagassiortullu tatiginangitsutut sullarluttutullu inoqatitsinniit nalilerneqartualerput. USA-mi præidentiusimasoq Donald Trump ilaarlugu, immaqaluunniit periusaa atorlugu innuttaasut tusarusunngisaminnik tusaallutillu tusagassiinerliuisutut suaaruteqartalersimapput.

Allaammi innuttaasut naammagittaalliortuarput tujorminartuinnarnik tusarlerneqarusugatik, nutaarsiassanillu nuannernerusunik noqqaallutik. Tusagassiorfiit tusaarusutatsinnik immersuissallutik pisussaaffiginngilaat. Kiffaanngissuseqarnerat tamatigut illersugassaavoq pissutsinillu nuanniikkaluartunilluunniit tusagassiisarnissaat pisariaqavimmat.

Paasinarpoq tusagassiortunngorusussuseq appasimmat, tusagassiorfinilu sulisussaaleqineq takussaaleqqasoq ersarilluni. Naak Inatsisartuniit tusagassiortut tusagassiorfiillu innuttaasuniit qanoq isigineqarnerasoq susinnaanngikkaluaripput, atugassarititaasut iliuuseqataaffigisinnaavagut. Uagullu qinikkat tusagassiortut qanoq eqqartornerigit, tatiginangissaarinaveersaarnikkullu aamma allanngueqataasinnaalluta.

Qujanartumik suut tusaarusunnerlutigit aalajangersinnaavarput, suna atuassanerlutigu. Aamma tv radiolu qameriaannaavagut malinnaaffigerusunngikkutsigit. Ajoraluartumilli isumaqartoqalersimavoq pinngitsoorata tamaasa naalaartariaqarigit, naak pinngitsaaliissutaanngikkaluartut. Ajoraluartumilli isumaqalersimavugut tusagassiortut tusarliuttagaat aalajangeeqataaffigisinnaallutigit, suullu sammissaneraat, qanorlu sammivilerlugit oqaatigineqassanersut. Tassa ilikkagassarput.



Tusagassiortunngorusunnermi annertusassagutsigu qanoq allatut iliorsinnaavugut? Siullertut tusagassiortut suliffimmi atugaat suliffeqarfiup pitsanngorsarsinnaavaat, uagullu tusagassiortunngorniartunut ilinniarfik pilerinarsarnerusinnaavarput, naammassillutillu sulilerpata kiffaanngissuseqarlutik tusarliiuartarnissaat ataavartinniarsaralutigu.

Ilisimasassarpullu aana; tusagassiorfiit kiffaanngissusillit nammineerlutik oqariartuut ilusilersinnaasussaavaat, aamma politikikkut pissutsit apeqqusersinnaasussaavaat, isumaqatiginngikkaluarutsigilluunniit. Nunarsuatsinnilu tusagassiorfiit kiffaanngissusillit pissutsinut qaqilerillutik allaat politikikkut oqallisigineqanngikkaluartut politikikkut pingaarutilittut inissiisinnaassuseqarlutik.¹

Atassummiillu isumaqarpugut nunatsinni tusagassiorfiit ingerlalluassappata, tusagassiortuunerlu pilerinartissagutsigu, uagut peqataasariaqarpugut tusagassiuutit kiffaanngissuseqartuarnissaat anguniarlugu. Uparuaannavikkutsigimmi tusagassiortuuneq pilerinarunnaavissaaq allaallu tusagassiorfiit sulisussaaleqisalissallutik. Tassungalu killereeratta maani inersuarimi ammasumik oqallissaarillunga isummasi tusarusuppagut.

¹ Politisk medialisering